

GAZTERIA ETA KIROLA SAILA

KIROL DIRULAGUNTZAK 2019: KIROL KLUBEN ETA ELKARTEEN FUNTZIONAMENDURAKO OINARRI-ARAU ESPEZIFIKOAK

1. ARTIKULUA.- Xedea eta helburuak

Oinarri-arau hauen xedea hauxe da: 2019an zehar, Oiartzungo kirol-klub eta -elkarteen **ohiko funtzionamendua** garatzeko, kirol modalitate bakoitzaren denboraldiak hartzen duen aldiaren arabera, norgehiagoka prozeduraren bidez, dirulaguntzak banatzeko Oiartzungo udalaren dirulaguntzen oinarri arautzaileak ezartzea.

Dirulaguntza hauetan kontuan izango da Oiartzungo Udalaren dirulaguntzak arautzen dituen Ordenantza, 2019-2021rako dirulaguntzen Plan Estrategikoa, eta 2005eko Berdintasun Legeak 3. tituluan jasotzen duena. Honen arabera, 16, 18.4, 23. eta 24.2 artikuluetako printzipio orokorrak Euskal Autonomia Erkidegoko herri-aginte guztiei aplikatuko zaizkie baita erakunde pribatuei ere, baldin eta Erkidegoko herri aginteetako batekin kontratuak edo lankidetzak-hitzarmenak sinatzen badituzte, edo herri-aginte horiek emandako laguntzen edo diru-laguntzen onuradunak badira.

Beraz, pertsona edo elkarte onuradunak aplikatzekoa zaion indarreko araudi guztia errespetatu beharko du; eta bereziki Emakumeen eta Gizonen Berdintasunerako 4/2005 Legea.

2. ARTIKULUA.- Onuradunak eta parte-hartze baldintzak

Oiartzungo Udalaren dirulaguntzak emateko Ordenantza Orokorrak ezartzen duenaz gain, oinarri espezifiko hauek arautzen dituzten dirulaguntzak, baldintza hauek betetzen dituzten Oiartzungo Kirol-klub eta -elkarateek eskatu ahal izango dituzte:

- a) Indarrean dagoen legeriaren arabera eratuta egotea eta Euskadiko Kirol Erakundearen Erregistroan (Eusko Jaurjaritza) inskribatuta egotea.
- b) Identifikazio Fiskaleko Kodea edukitzea eta zerga-betebeharretan eta Gizarte Segurantzakoetan egunean egotea.
- c) Helbide soziala eta jardute eremua Oiartzunen edukitzea. Salbuespen gisa, Gazteria eta Kirol Sailak, jardute eremua Oiartzunen izanik, interesgarritzat jotzen dituen jarduerak eta proiektuak egiten dituzten klubak ere onartuko dira, nahiz eta goitza Oiartzunen ez izan.
- d) Gipuzkoako lurraldeko Eskola Kiroleko araudia betetzea. (125/2008 Foru Dekretua, uztailaren 1ekoa, Eskolako Kiroolari buruzkoa eta 02-109/2018 Foru Agindua, ekainaren 26koa, 2018-2019 ikasturteko eskola kiroleko jardueren programa onartzen duena)

Ezin izango dute dirulaguntzarik jaso, indarrean den araudiari jarraiki, eskubide hori mugatuta edo ezabatuta duten pertsonak edo erakundeak. Halaber, ezin izango dute dirulaguntzarik eskuratu behin betiko ebazpen bidez eskubide hori ebazpenak erabakitako epean galtzera zigortutakoek ere, edo Dirulaguntzen 38/2003 Lege Orokorrak 13. artikuluan adierazitako beste edozein kasutan daudenean.

Ez zaie dirulaguntza emango ondorengo entitateei:

- Elkarteak sexu-bereizkeriagatik zigor administratiboa edo penala jaso duenean.
- Erakundeak edo entitateak bere helburuetan, onarpen-sisteman, funtzionamenduan, ibilbidean edo jardueretan emakumeen eta gizonen berdintasunaren printzipioaren aurkakoak diren edo argi eta garbi bereizkeriakoak diren kontuak edo alderdiak dituztenei.
- Ezingo dute onuradun izaera eskuratu beren baitan gizon eta emakumeen presentzia eta parte-hartzea berdintasun egoeran gauzatzea galarazten duten elkarteak, salbu eta, sexu bakarreko kideek osatutako elkarteak izanik, helburu nagusia gizon eta emakumeen arteko berdintasuna lortzea edo emakumezkoen nahiz gizonezkoen berariazko interes eta beharrak sustatzea dutelarik.

Ondorengo kirol modalitate, kirol-klub eta elkarteak deialdi hontatik kanpo gelditzen dira:

- Mendizaletasuna, ehiza, arrantza eta zikloturismo modalitateak, modalitatearen barne estruktura eta praktika motaren ezaugarriak kontuan hartuta, antolatutako ekintzen arabera jasoko dituzte dirulaguntzak eta dirulaguntza lerro honetan ez dute parte hartzerik izango.
- Oarsoaldeako kirol koordinazio mahaian hartutako akordioen ondorioz trataera berezia izango duten eskualde izaera duten kirol-klub eta -elkarteak, beste tratarea izango dutelarik.

3. ARTIKULUA.- Diruz lagunduko ez diren gastuak

Ez da dirulaguntzarik emango honelako gastuetarako:

- Udal sail beraren edo beste udal sail baten berariazko eskumenekoak diren eta horien laguntza edo hitzarmen baten barruan sartzen diren gastuak.
- Dirulaguntza ematen den ekitaldi ekonomikoan ez, baizik eta beste batean gauzatuko diren gastuak.

4. ARTIKULUA.- Dirulaguntzaren kontzeptuak eta irizpideak. Zenbatekoa. Gehienezko dirulaguntza eta aldaketak

4.1 DIRULAGUNTZEN KONTZEPTUAK ETA IRIZPIDEAK

Oinarri hauetan zehaztutako ohiko kirol jarduerak diruz laguntzeko zehaztutako zenbateko guztia, epe barruan aurkeztutako eskaera guztiak kontutan hartuz, jarraian azaldutako kontzeptu eta irizpideen arabera banatuko dira:

1. **KIROLARIAK: Federazioko kirol-lizentzia bakoitzeko**

- Lizentzia bakoitzeko **puntu 1**
 - o Emakume federazio lizentziak **0,5 puntu gehiago**
 - o Oiartzuar herritarren lizentzia bakoitzeko **puntu 1 gehiago**
 - o 12-18 urte bitarteko kirolari bakoitzeko **puntu 1 gehiago**
 - o Aniztasun Funtzionaldun Kirolari lizentzia bakoitzeko **10 puntu gehiago**

Honako hauek ere hartuko dira federazioko lizentziatzat: infantil eta kadete kategorietako kirolarien lizentziak, baldin eskola-lehiaketetan kirol-klub gisa parte hartzen badute.

2. **ENTRENATZAILEAK: Entrenatzaileen titulazio, euskara maila eta generoa**

Kirol titulazioa:

- o Jarduera fisikoaren eta kirolaren zientzietako lizentziatuduna edo graduatua edo 3. Maila (KEE⁽¹⁾), Nazionala (edo baliokidea): **8 puntu**
- o Irakasle ikasketak heziketa fisikoa (kirol magisteritza) edo 2. Maila (KEE⁽¹⁾), Lurraldekoa: **4 puntu**
- o Gorputz eta kirol ekintzen teknikaria (TAFYD) edo 1. Maila (KEE⁽¹⁾), Monitorea: **2 puntu**
- o Gazte eta Kirola Plan (GKP) – 0. Maila edo eskola kiroleko titulazioa eta antzekoak: **puntu 1**
- o Monitore titulugabea edo laguntzailea: **0 puntu**

⁽¹⁾ Kirolaren Euskal Eskola

Euskera titulazioa:

- o 2. Maila (EGA edo baliokidea): **4 puntu**
- o 1. Maila (2. HE edo baliokidea): **2 puntu**

Genero irizpidea:

- o Emakume entrenatzaile bakoitzeko: **x1,5 puntu**

3. ZUZENDARITZA: genero irizpidea

- Zuzendaritza parekidea izateagatik. Gehienez **10 puntu**

4. MODALITATEAK: bereziki sustatutako modalitateak

Bi lerro zehazten dira irizpide honetan:

- 1) Kirol-klub edo -elkarte berri edo bereziki sustatu beharrekoak.

UKABen aurkezten diren proiektu guztietatik gehienez hiru aukeratuko dira eta ohiko dirulaguntzaz gain ondorengo puntuak gehituko zaizkie, UKAB-en onartutako denboralditik kontutan hartuta:

1. Aurreko denboraldia onartu bazen: **100 puntu**
2. Orain dela 2 denboraldi onartu bazen: **50 puntu**
3. Orain dela 3 denboraldi onartu bazen: **25 puntu**
4. 4. denboralditik aurrera ez da puntuatuko

- 2) Herrian historikoki lotura berezia izan duten kirol modalitateak sustatzen dituzten kirol-klub edo -elkarteak, ondare kultural bat dutenak eta laguntzarik ezean kirol minoritarioak izanik desagerpena joko luketenak: lizentzia bakoitzeko **4,5 puntu gehiago**.

Irizpide hauekin eskaera bakoitza baloratu ondoren, dagokion diru partidan gordetako dirua guztien artean proportzionalki banatuko da.

4.2 ZENBATEKOA

Programa honen bidez deitutako diru-laguntzen zenbatekoa **54.000,00 euro** izango da, 1102.481.341.00.02 2019 aurrekontu partidaren kargura. eta lehiaketa bitartez "Ohiko Kirol Jardueretarako dirulaguntza" kontu sailaren kontura finantzatuko da.

4.3 GEHIENEZKO DIRULAGUNTZA ETA ALDAKETAK

Oinarri hauetan araututako dirulaguntzak bateragarriak izango dira edozein Administrazio edo erakunde publiko zein pribatuk xede berarekin emandako beste dirulaguntza, laguntza, diru-sarrera edo baliabiderek.

Aurreko kasuan, onuradunak jakin bezain laster jakinarazi beharko dio organo emaileari dirulaguntza, laguntza, diru-sarrera edo baliabide horiek lortu izana, eta nolana ere, jasotako fondoei emandako aplikazioa justifikatu aurretik.

Udalak emandako dirulaguntzen zenbatekoak ezin izango du inoiz, bakartuta zein beste dirulaguntza, laguntza, diru-sarrera edo baliabide batzuekin batera, erakunde onuradunak diruz lagunduta garatu beharreko jardueraren kostua gainditu.

5. ARTIKULUA.- Eskaerak aurkezteko lekua eta dokumentazioa

2. artikuluan zehaztutako baldintzak betetzen dituzten kirol -klub eta -elkartek dirulaguntzak lortu nahi badituzte, Oiartzungo Udalaren erregistrora jo beharko dute eta honako dokumentazioa aurkeztu beharko dute:

- a) Eskaera orri orokorra. **(I. ERANSKINA)**
- b) Erakunde eskatzailearen pertsona arduradunaren edo ordezkariaren NANaren fotokopia. ⁽¹⁾
- c) Kirol -klub edo -elkartearen Identifikazio Fiskaleko Kodearen fotokopia. ⁽¹⁾
- d) Entitatearen estatutuak. ⁽¹⁾
- e) Euskadiko Kirol Erakundearen Erregistroan izena emanda egotearen egiaztagiriaren kopia. ⁽¹⁾
- f) Kontu korrontearen titulartasunaren ziurtagiria. ⁽¹⁾
- g) Araudi honek arautzen duen kirol jarduerari dagokion denboraldiko programaren txosten originala, erakundearen organo eskudunak onartuta.
- h) Programaren gastuen (kontzeptua eta zenbatekoa) eta sarreraren (jatorria eta zenbatekoa) aurrekontua. **(II. ERANSKINA)**

ERNE: Eranskin hau kirola@oiartzun.eus posta elektronikora ERE bidali beharko da.

- i) Zinpeko aitortpena, Gizarte segurantzaren betebeharren, zerga betebeharren eta beste dirulaguntzen ingurukoa. **(III. ERANSKINA)**
- j) Gipuzkoako lurraldeko Eskola Kirola araudia betetzen duen zinpeko aitortpena. **(IV. ERANSKINA)**
- k) Ohiko jarduerarako Kirol Jarduera Eranskina **(V. ERANSKINA)**

OHARRA: Kirol modalitate bat baino gehiago izanez gero, gainontzeko modalitateentzako **V.b ERANSKINA** ere bete.

ERNE: Eranskin hau(ek) kirola@oiartzun.eus posta elektronikora ERE bidali beharko d(ir)a.

- l) Kirolari federatuen zerrenda federazioak zigilatuta (izen-abizenak, jaiotze-data, sexua, kategoria...) edo dagozkien fitxak.

⁽¹⁾ Agiria aurreko urteetan aurkeztu bada eta geroztik aldaketarik egon ez bada, ez da berriro aurkeztu behar.

6. ARTIKULUA.- Akatsak zuzentzea eta dokumentazio osagarria aurkezte

Eskaerak edo horrekin batera doan dokumentazioak ez baditu identifikazio datuak biltzen, akatsen bat badu edo zerbait falta bada, eskatzaileari eskatuko zaio 38/2003 dirulaguntzak arautzen dituen Lege Orokorrak eta Udal Ordenantza Orokorrak ezarritakoari jarraiki, hamar eguneko epean akats horiek zuzentzeko; eta adieraziko zaio ezen, hori egingo ez balu, eskaeran atzera egin duela ulertuko dela, aipatu legearen 23. artikuluan aurreikusitako moduan.

7. ARTIKULUA.- Epeak

Diru- laguntza eskaerak, 30 egun balioduneko epean aurkeztu behar dira, Gipuzkoako Aldizkari Ofizialean deialdi hau argitaratzen denetik zenbatzen hasita, 5. artikuluan deskribatutako agiriekin batera.

8. ARTIKULUA.- Beste dirulaguntzekin bateragarritasuna

Araudi honetako dirulaguntzak bateragarriak izango dira erakunde publiko edo pribatuek xede bererako eman ditzaketen bestelako diru-laguntzekin. Bateragarritasunari buruz sortu daitezkeen zalantzak argitzeko, Oiartzungo Udalaren diru-laguntzak emateko Ordenantza Orokorrak 14. artikuluan finkatzen dituen irizpideak jarraituko dira.

9. ARTIKULUA.- Emateko prozedura

Dirulaguntzak emateko prozedurak, Oiartzungo Udalaren dirulaguntzak arautzen dituen Ordenantzak IV. Tituluan (22-23 artikulua) zehazten diren pausoak jarraituko ditu, bertan azaltzen diren baldintzekin:

- Kirol arloko teknikariak dirulaguntza eskariak ebaluatuko ditu.
- Txostena egin eta Gazteria eta Kirol Saileko Batzordera eramango du, honek txostena kontuan hartuta, bere iritzia eman eta behin-behineko proposamena luzatu dezan.
- Udal Osoko Bilkurak behin-behineko proposamena onartuko du, hamar eguneko epea eskainiz interesatuei alegazioak aurkezteko. Prozeduran pertsona interesdunek argudiatutakoak beste egintzarik, alegaziorik edo frogarik agertzen ez denean, entzunaldi-izapide hori bazter utzi ahal izango da. Kasu horretan, ebazpen-proposamena behin betikoa izango da.
- Aurkeztutako alegazioak (baleude) aztertu ondoren, behin betiko ebazpen-proposamena egingo da. Proposamen horrek dirulaguntzaren emakidarako proposatzen dituen eskatzaileen zerrenda eta zenbatekoa adierazi beharko ditu, bere ebaluazioa eta hori egiteko erabilitako balorazio-irizpideak adierazita, eta baita zer eskaera ez dituen aintzat hartu eta zer arrazoitan oinarritu den ere.

Udaleko iragarki taulan eta www.oiartzun.eus web orrian ere behin-behineko proposamenaren eta behin betiko ebazpenaren berri emango da.

Behin betiko ebazpena egiteko eta jakinarazteko gehienezko epea sei hilabetekoa da, 7. artikuluan zehazten den epetik kontatzen hasita. Epe hori ebazpena espreski jakinarazi gabe igarotakoan, pertsona edo erakunde eskatzaileek ezetsizat jo ahal izango dituzte beren dirulaguntzarako eskaerak.

Behin betiko dirulaguntzaren jakinarazpena eman dela jakinarazi ondoren, ordainketa tramitatuko da. Eta kontuan izango dira, halaber, Oiartzungo Udalaren dirulaguntzei buruko Ordenantzaren VII. Tituluan aipatzen diren aspektu guztiak.

Ordainketa era honetan gauzatuko da:

- Dirulaguntzaren lehenengo zatia, %80a, gastuen konturako aurrerakin moduan, hura onartzen denean.
- Gainerako %20a, denboraldia amaitu ondoren, **11.1 JUSTIFIKATZEKO EPEA** atalean zehaztutako datarako eta **11.2 JUSTIFIKATZEKO ERA** atalean zehaztutako dokumentazioa aurkeztu ondoren.

10. ARTIKULUA.- Onuradunen betebeharrak

Deialdi honetako dirulaguntzen onuradunek, Oiartzungo Udalaren dirulaguntzak arautzen dituen Ordenantzaren 6. artikulua ezartzen dituen betebeharrak bete beharko dituzte.

Ordenantzaren 7., 8. eta 9. artikuluek, hizkuntza, berdintasun eta ingurumen irizpideen inguruan ezartzen dituzten betebeharrak bete beharko dituzte ere.

Aurretik aipatutakoez gain, kirol-klub eta -elkarte onuradunek honako hauek ere bete beharko dituzte:

- a) Dirulaguntzak jaso ahal izateko ezinbestekoa izango da Udal Kirol Aholku Batzordeko (UKAB) aurreko denboraldiko bileretako %50era ordezkaritza baten asistentzia izana.
- b) Diruz lagundutako edozein jardueraren antolatzaileak idatziz, ahoz edo irudi bidez eginiko iragarki guztietan Oiartzungo Udalaren laguntzaren berri eman beharko du, haren logotipoa txertatuz (ad.: weba, pankartak, ekipaia...).
- c) Parte hartzen duen lehiaketa ofizialetan lortutako emaitzen berri eman beharko du zehaztuko diren kanalen bitartez.

11. ARTIKULUA.- Dirulaguntza justifikatzea

11.1 JUSTIFIKATZEKO EPEA

- Denboraldiko antolaketa dutenek 2019ko irailaren 30erako.
- Urteko antolaketa dutenek 2020ko urtarrilaren 31erako.

11.2 JUSTIFIKATZEKO ERA

Azaldutako epearen barnean eta Oiartzungo Udalaren dirulaguntzak arautzen dituen Ordenantzako VII tituluan zehazten dena jarraikiz, honako dokumentazioa aurkeztu beharko da:

- a) Eskaera orri orokorra (I. ERANSKINA)
- b) Kirol memoria. (VI. ERANSKINA)

ERNE: Eranskin hau kirola@oiartzun.eus posta elektronikora ERE bidali beharko da.

- **Jarduerei buruzko memoria.** Lortu dituzten emaitzei buruzko balantzea ere aurkeztuko da. (gizonezkoena eta emakumezkoena)
- Taldea osatzen duten gizonezkoen eta emakumezkoen buruzko kirol balantzea (**sailkapenak, tituluak, selekzionatuenak...**).
- Egin bada, egin diren komunikazio guztien ale bana erantsi.

- c) Memoria ekonomikoa. (VII. ERANSKINA)

ERNE: Eranskin hau kirola@oiartzun.eus posta elektronikora ERE bidali beharko da.

- Izandako diru-sarreraren eta gastuen **balantze orokorra.**
- **VII. ERANSKINA** osatu, zehaztutako atal eta azpi-atalen arabera.
- Diruz lagundutako ekintzen gastuak osotara justifikatzen dituzten **fakturen kopiak VII. ERANSKINEAN** azaltzen den ordenaren arabera.
- Entitateak denboraldian izan dituen **laguntzen eta diru -laguntzen kopia (hitzarmenak, GAO, EAO, ...).**

11.3 JUSTIFIKATZEKO DOKUMENTU BAIMENDUAK

Oiartzungo Udalaren dirulaguntzen ordenantza orokorreko I. eranskinean zehaztutako dokumentuak bakarrik onartuko dira dirulaguntza justifikatzeko.

12. ARTIKULUA.- Dirulaguntza itzultzea

Deialdi honetako 11. artikulua ezartzen duena betez, diru-laguntza eman deneko jardueraren gastuaren aurrekontuari dagokion gastua justifikatzen ez bada, dirulaguntza osoa edo zati bat eta dagokion berandutze-interesa itzuli beharko da, Oiartzungo Udalaren diru-laguntzak arautzen dituen Ordenantzaren IX. Tituluak arautzen duen prozedura jarraituz.

13. ARTIKULUA.- Araudi osagarria

Oinarri-arau espezifiko hauetan berariaz jasotzen ez diren gai guztietan, deialdiaren oinarri-arau orokorretan xedatutakoari jarraituko zaio.

Halaber, Diru-laguntzei buruzko Udal Ordenantzari, Dirulaguntzen 38/2003 Lege Orokorrari eta bat datozen gainontzeko lege xedapenei jarraituko zaie.